

摘藻堂四庫全書薈要

史部

欽定四庫全書薈要卷六千七百七十九 史部

明史卷一百八十六

大學士張廷玉等奉勅修

列傳第七十四

韓文

顧佐  
陳仁

張敷華

楊守隨

弟守隅

許進

子誥  
讚論

雍泰

張津

陳壽

樊瑩

熊繡

潘蕃

胡富

張泰

吳文度

張鼎

冒

政

王璟

朱欽

韓文字貫道洪洞人宋宰相琦後也生時父夢紫衣人  
抱送文彥博至其家故名之曰文成化二年舉進士除  
工科給事中覈韋州軍功劾寧晉伯劉聚都御史王越  
馬文升等濫殺妄報尋劾越薦李秉王竑語頗涉兩宮  
帝怒撻之文華殿庭已進右給事中出為湖廣右參議

中官督太和山乾沒公費文力遏之以其羨易粟萬石  
備振貸九谿土酋與鄰境爭地相攻文往諭皆服閱七  
年轉左弘治改元王恕以文久淹用為山東左參政居  
二年用倪岳薦擢雲南左布政使以右副都御史巡撫  
湖廣移撫河南召為戶部右侍郎母喪除起改吏部進  
左十六年拜南京兵部尚書歲侵米價翔踴文請預發  
軍餉三月戶部難之文曰救荒如救焚有罪吾自當之  
乃發廩十六萬石米價為平明年召拜戶部尚書文凝

厚雍粹居常抑抑至臨大事剛斷無所撓武宗即位賞  
賚及山陵大婚諸費需銀百八十萬兩有奇部帑不給  
文請先發承運庫詔不許文言帑藏虛賞賚自京邊軍  
士外請分別給銀鈔稍益以內庫及內府錢并暫借勛  
戚賜莊田稅而敕承運庫內官核所積金銀著之籍且  
罷諸不急費帝不欲發內帑命文以漸經畫文持大體  
務為國惜財真人陳應禡國師納克布嘉勒燦等落職  
文請沒其貲實國帑舊制監局倉庫內官不過二三人

後漸添注或一倉十餘人上林苑林衡署至三十二人  
文力請裁汰淳安公主賜田三百頃復欲奪任邱民業  
文力爭乃止孝宗時外戚慶雲壽寧侯家人及商人譚  
景清等奏請買補殘鹽至百八十萬引文條鹽政夙弊  
七事論殘鹽尤切孝宗嘉納未及行而崩即入武宗登  
極詔中罷之侯家復奏乞下部更議文等再三執奏弗  
從竟如侯請正德元年内閣及言官復論之詔下廷議  
文言鹽法之設專以備邊今山陝饑寇方大入度支匱

絀飛輓甚難奈何壞祖宗法忽邊防之重景清復陳乞如故文等劾其桀悍請執付法官帝不得已始寢前命榮王乞霸州莊田崇王請自徵莊田租勿令有司與文皆持却之保定巡撫王璟請革皇莊廷議從之帝命再議文請命巡撫官召民佃畝徵銀三分輸內庫而盡撤中官管莊者大學士劉健等亦力言內臣管莊擾民乃命留中官各一人校尉十人餘如文議中旨索寶石西珠文請屏絕珍奇以養儉德報可帝將大婚取戶部銀

四十萬兩文連疏請得免四之一文司國計二年力遏  
權倖權倖深疾之而是時青宮舊奄劉瑾等八人號八  
虎日導帝狗馬鷹兔歌舞角觝不親萬幾文每退朝對  
僚屬語及輒泣下郎中李夢陽進曰公大臣義共國休  
戚徒泣何為諫官疏劾諸奄執政持甚力公誠及此時  
率大臣固爭去八虎易耳文將鬚昂肩毅然改容曰  
善縱事勿濟吾年足死矣不死不足報國即偕諸大臣  
伏闕上疏畧曰人主辨奸為明人臣犯顏為忠况羣小



作朋逼近君側安危治亂胥此焉關臣等伏覩近歲朝政日非號令失當自入秋來視朝漸晚仰窺聖容日漸清削皆言太監馬永成谷大用張永羅祥魏彬邱聚劉瑾高鳳等造作巧偽淫蕩上心擊毬走馬放鷹逐犬俳優雜劇錯陳於前至尊萬乘與外人交易狎暱媒褻無復禮體日遊不足夜以繼之勞耗精神虧損志德遂使天道失序地氣靡寧雷異星變桃李秋華考厥占候咸非吉徵此輩細人惟知蠱惑君上以便己私而不思赫

赫天命皇皇帝業在陛下  
一身令大婚雖畢儲嗣未建  
萬一遊宴損神起居失節  
雖齏粉若輩何補於事高  
皇帝艱難百戰取有四海  
列聖繼承以至陛下先帝  
臨崩顧命之語陛下所聞  
也奈何姑息羣小置之左  
右以累聖德竊觀前古奄  
宦誤國為禍尤烈漢十常  
侍唐甘露之變其明驗也  
今永成等罪惡既著若縱  
不治將來益無忌憚必患  
在社稷伏望陛下奮乾剛  
割私愛上告兩宮下諭  
百僚明正典刑以回天地  
之變泄神人之憤潛

削禍亂之階永保靈長之業疏入帝驚泣不食瑾等大懼時內閣劉健謝遷等方持言官章不肯下文疏復入帝遣司禮太監李榮王岳等詣閣議一日三至健等持益堅岳素剛直獨曰閣議是是夜八人者環泣帝前帝怒立收岳下詔獄而外廷固未之知也明日文倡九卿科道再詣闕固爭俄有旨宥八人不問健遷倉皇致仕去八人各分據要地瑾掌司禮時事遂大變瑾恨文甚日令人伺文過踰月有以偽銀輸內庫者遂以為文罪

詔降一級致仕郎中陳仁謫鈞州同知給事中徐昂乞  
留文原官中旨謂顯有囑託落文職以顧佐代並除昂  
名二年三月榜奸黨姓名自劉健謝遷外尚書則文為  
首餘若張敷華楊守隨林瀚等凡五十三人列於朝堂  
文子高唐知州士聰刑部主事士奇皆削籍文出都門  
乘一籃輿行李一車而已瑾恨未已坐以遺失部籍逮  
文及侍郎張縉下詔獄數月始釋罰米千石輸大同尋  
復罰米者再家業蕩然瑾誅復官致仕世宗即位遣行

人齋璽書存問賚羊酒令有司月給廩四石歲給役夫  
六人終其身復加太子太保廕一孫光祿寺署丞嘉靖  
五年卒年八十有六贈太傅謚忠定士聰舉人罷官後  
不復仕士奇進士終湖廣參政少子士賢亦由舉人為  
開封同知孫廷瑋進士行太僕卿顧佐字良弼臨淮人  
成化五年進士授刑部主事歷郎中按錦衣指揮牛循  
中官顧雄鍾欽罪無所撓出為河間知府弘治中再遷  
大理少卿擢右僉都御史巡撫山西宗室第宅官為繕

費不貲佐請悉令自營治正統末權發太原平陽民戍  
邊後久不代佐奏令更代八為左副都御史勘罷遼東  
總兵官李杲太監任良巡撫張玉厯戶部左右侍郎出  
理陝西軍食善區畫儲蓄餘三年正德改元代韓文為  
尚書劉瑾憾文摺撫萬端部有故冊逸欲以為文罪逼  
佐上其事佐不可坐事奪俸三月佐乃再疏乞歸從之  
瑾憾不置三罰米輸塞上至千餘石家貧稱貸以償卒  
贈太子太保陳仁字子居莆田人成化末進士弘治中

官戶部郎中闕里先聖廟災疏請修省陝西進古璽仁  
疏斥其偽詔召番僧琳沁扎勒於四川仁疏諫又請復  
建文忠臣方孝孺等官多格不行正德初瑾以贖銀事  
坐尚書文罪仁並謫後瑾誅累擢至浙江右布政使

張敷華字公實安福人父洪御史死土木難敷華少負  
氣節年七歲里社樹為祟麾羣兒盡伐之景泰初錄死  
事後入國學舉天順八年進士選庶吉士成化元年與  
劉大夏願就部曹除兵部主事歷郎中廉重不撓名等

於大夏十一年出為浙江參議景寧礦盜起至數千人  
數華諭散之執其魁十二人居浙十餘年厯布政使弘  
治初遷湖廣歲饑令府縣大修學宮以備直資餓者擢  
右副都御史巡撫山西中道奔喪服闋還故官部內賦  
輸大同困於折價數華請太原以北可通車者仍輸米  
民便之改撫陝西製婚娶喪葬之式納民於禮妖僧據  
終南山為逆廷議用兵尚書馬文升曰張都御史能辦  
此數華果以計縛僧歸遷南京兵部右侍郎十二年改



右都御史總督漕運兼巡撫淮揚諸府高郵湖堤圯浚  
深溝以殺水勢又築寶應堤民利賴焉改掌南京都察  
院與吏部尚書林瀚僉都御史林俊祭酒章懋稱南都  
四君子就遷刑部尚書正德元年召為左都御史其冬  
大臣與言官請去劉瑾等內閣力主之帝猶豫數華乃  
上言陛下宴樂逸遊日狎愴壬政令與詔旨相背行事  
與成憲交乖致天變上千人心下拂令給事中劉滂御  
史朱廷聲徐鈺等連章論列但付所司英國公懋與臣

等列名上請但云朕自處置臣竊歎惑請畧言時政之  
弊如四十萬庫藏已竭而取用不已六七歲童子何知  
而招為勇士織造已停傳奉已革尋復如故鹽法莊田  
方遣官清覈而奏乞之疏隨聞中官監督京營鎮守四  
方者一時屢有更易政令紛拏弊端滋蔓夫國家大事  
百人爭之不足數人壞之有餘願陛下審察疏入不報  
既而朝事大變宦官勢益張至除夕朝罷忽傳旨與楊  
守隨俱致仕數華即日就道至徐州洪坐小艇觸石幾

溺死瑾恨未已欲借湖廣倉儲浥爛坐以贓罪修撰康海過瑾曰吾秦人愛張公如父母公忍相薄耶瑾意稍解猶坐數華奸黨與守隨等榜名朝堂明年六月病且革衣冠揖家廟就榻而卒瑾誅後二年贈太子少保謚簡肅數華性剛介弘治時劉大夏常薦之帝曰數華誠佳但為人太峻耳為部郎奉使盜探其囊得七金而已孫鰲山官御史

楊守隨字維貞鄞人侍郎守陳從弟也舉成化二年進

士授御史巡視漕運覈大同軍餉巡按江西所至以風  
采見憚六年疏陳六事言邸王受命艱危時削平禍亂  
功甚大歿乃謚以戾公論不平此非先帝意權奸逞私  
憾者為之也亟宜改易彰陛下親親之仁尚書李秉効  
忠守法一時良臣為蕭彥莊誣劾致仕乞即召還律令  
犯公罪者不罷近御史朱賢妻芳等竝除名乞復其官  
且戒所司毋法外加罪一以律令從事西征之役以數  
萬甲兵討出沒不常之寇千里轉輸曠日持久恐外患

未平內地先赦乞速班師戒邊臣慎封守近例軍官犯罪未結正者遇赦即原致此曹遷延以希倖免自今衆証明白者即據律定案毋使逃罪雖遇赦亦不得免管軍在外官俸兵餉有踰年不給者由郡縣蓄積少也請於起運外量加存留以濟乏匱疏奏時不能從太常少卿孫廣安母喪起復守隨與給事中李和等連章論之乃令守制八年冬以災異陳時政九事廷議四方災傷停遣刷卷御史會昌侯孫繼宗請并停在京者守隨言

繼宗等任情作奸恐罪及假此祈免帝置繼宗不問而  
刷卷如故山東饑廷議吏納銀免考授冠帶守隨極言  
不可帝即罷之擢應天府丞未上母憂歸服除無缺添  
註視事初李孜省授太常寺丞因守隨言改上林監副  
憾之至是譖於帝中旨責守隨不當添註調南寧知府  
弘治初召為應天府尹勘南京守備中官蔣琮罪琮族  
其黨郭鏞劾守隨按給事方向獄不公謫廣西右叅政  
久之進按察使八年召為南京右僉都御史提督操江

歷兩京大理卿九載滿進工部尚書仍掌大理寺刑部  
獄送寺覆讞者多加刑主事朱塗論其非守隨言自永  
樂間寺已設刑具部囚多未得實安得不更訊帝乃寢  
塗奏孝宗崩中官張瑜等以誤用御藥下獄守隨會訊  
杖之正德元年四月守隨奏每歲熱審行於京師而不  
行於南京五歲一審錄詳於在京而略於在外皆非是  
請更定其制報可中官李興擅伐陵木論死令家人以  
銀四十萬兩求變其獄守隨持之堅獄不得解廷臣之

爭餘鹽也中旨詰是何大事守隨語韓文曰事誠有大  
於是者文遂偕九卿伏闕論八黨文等既逐守隨憤獨  
上章極論之曰陛下嗣位以來左右近臣不能祇承德  
意盡取先朝良法而更張之盡誣先朝碩輔而剗汰之  
天下嗷嗷莫措手足致古今罕見之災交集數月以內  
陛下獨不思其故乎內臣劉瑾等八人奸險佞巧誣罔  
恣肆人目為八虎而瑾尤甚日以荒縱導陛下或在西  
海擎鷹搏兔或於南城躡峻登高禁內鼓鈺震於遠邇



宮中火燬聲徹晝夜淆雜尊卑陵夷貴賤引車騎而供  
執鞭之役列市肆而親商賈之為致陛下日高未朝漏  
盡不寢此數人者方且竊攬威權詐傳詔旨放逐大臣  
刑誅臺諫邀阻封章廣納貨賂傳奉冗員多至千百招  
募武勇收及孩童紫綬金貂盡予爪牙之士蟒衣玉帶  
濫授心腹之人附己者進官忤意者褫職內外臣僚但  
知畏謹不知畏陛下向也二三大臣受遺夾輔今則有  
潛交默附漏泄事機者矣向也南北羣僚矢心痛疾今

則有畫策主文依附時勢者矣而且數易邊境將帥之  
臣大更四方鎮守之職志欲何為夫太阿之柄不可授  
人今陛下於兵刑財賦之區機務根本之地悉以委之  
或掌團營或主兩廠或典司禮或督倉場大權在手彼  
復何憚於是大行殺戮廣肆誅求府藏竭於上財力匱  
於下武勇疲於邊上下胥讒神人共憤陛下猶不覺悟  
方且謂委任得人何其舛也伏望大奮乾剛立寘此曹  
重典遠鑒延熹之失毋使臣蹈藩武已覆之轍疏入帝

不省瑾輩深銜之傳旨致仕守隨去李興遂以中旨免死矣瑾憾未釋三年四月坐覆讞失出逮赴京繫獄罰米千石輸塞上踰年復坐庇鄉人重獄除名追毀誥命再罰米二百石守隨家立破瑾誅復官又十年卒年八十五贈太子少保謚康簡從弟守隅由進士歷官江西叅政有政績寧府祿米石徵銀一兩後漸增十之五守隅入請於王裁減如舊瑾惡守隨竝罷守隅官瑾死後起官四川終廣西布政使

許進字季升靈寶人成化二年進士除御史厯按甘肅  
山東皆有聲陳鉞激變遼東為御史強珍所劾進亦率  
同官論之汪直怒搆珍下獄摘進他疏譌字廷杖之幾  
殆滿三考遷山東副使辨疑獄人稱神明分巡遼東坐  
累徵下詔獄孝宗嗣位釋還弘治元年擢右僉都御史  
巡撫大同小王子久不通貢遣使千五百餘人款關進  
以便宜納之請於朝詔許五百人至京師已而屢盜邊  
進被劾不問三年復窺邊進等整軍待之新寧伯譚祐

以京軍援及遁去又乞通貢進再為請帝許之當是時  
大同士馬盛強邊防修整貢使每至關率下馬脫弓矢  
入館俛首聽命無敢譁者會進與分守中官石岩相訐  
岩徵還進亦謫兗州知府七年遷陝西按察使土魯番  
阿黑麻攻陷哈密執忠順王善巴去使其將伊蘭守之  
尚書馬文升謂復哈密非進不可乃薦為右僉都御史  
巡撫甘肅明年涖鎮告諸將曰小醜陸梁謂我不敢深  
入耳堂堂天朝不能發一鏃塞外何以慰遠人諸將難

之乃獨與總兵官劉寧謀厚結舒埒圖使以四千騎往  
殺數百人舒埒圖中流矢卒舒埒圖故與土魯番世相  
讐及死子博囉阿爾台益憤進復厚結之使斷賊道無  
令東援伊蘭而重犒赤斤罕東及哈密遺種之居苦峪  
者令出兵助討十一月副將彭清以精騎千五百出嘉  
峪關前行寧與中官陸闇統二千五百騎繼之越八日  
諸軍會伊濟穆爾川薄暮大風揚沙軍士寒栗僵卧進  
出帳外勞軍有異鳥悲鳴將士多雨泣進慷慨曰男兒

報國死沙場幸耳何泣為將士皆感奮夜半風止大雨  
雪時番兵俱集惟罕東兵未至衆欲待之進曰潛師遠  
襲利在捷速兵已足用不須待也及明冒雪倍道進又  
六日奄至哈密城下伊蘭已先遁去餘賊拒守官軍四  
面竝進拔其城獲善巴妻女賊退保圖拉圖拉華言太  
臺也守者八百人諸軍再戰不下問其俘則皆哈密人  
為伊蘭所劫者進乃令勿攻或欲盡殲之進不可遣使  
撫諭即下於是探伊蘭所嚮分守要害而疏請懷輯罕

東諸衛為援散土魯番黨與孤其勢遂班師錄功加右副都御史明年移撫陝西厯戶部右侍郎進左十三年和碩大舉犯大同邊將屢敗敕進與太監金輔平江伯陳銳率京軍禦之無功言官劾輔等玩寇并論進致仕去武宗即位乃起為兵部左侍郎提督團營正德元年代劉大夏為尚書七月應詔陳時政八事極言內監役京軍守皇城内侍橫索月錢諸弊多格不行又以帝狎比羣小請崇聖學以古荒淫主為戒不納中官王岳奏



官校王縉等緝事捕盜功各進一秩進言邊將出萬死  
敵一賊始獲晉級此輩乃冒濫得之孰不解體又言團  
營軍非為營造設宜悉令歸伍居兵部半歲改吏部明  
年加太子少保進以才見用能任人性通敏劉瑾弄權  
亦多委蛇徇其意而瑾終不悅方進督團營時與瑾同  
事每閱操談笑指揮意度閒雅瑾及諸將咸服一日操  
畢忽呼三校前各杖數十瑾請其故進出權貴請託書  
示之瑾陽稱善心不喜至是欲去進用劉宇代焦芳以

干請不得亦因擠進三年八月南京刑部郎中闕適無  
實授員外郎進循故事以署事主事二人上瑾以為非  
制令對狀進不引咎三降嚴旨譙責不得已請罪乃令  
致仕未幾坐用雍泰削其籍二子誥讚在翰林俱輸贖  
調外任尋與劉健等六百七十五人竝追奪誥命瑾又  
摘進在大同時籍軍出雇役錢失勾校欲籍其家會瑾  
誅得解復官致仕未聞命卒年七十四嘉靖五年謚襄  
毅子誥讚詩詞論詩工部郎中詞知府誥字廷綸進次

子也弘治十二年進士授戶科給事中出視延綏軍儲  
論丁糧丁草之害帝褒納之尋劾監督中官苗達貪肆  
罪進刑科右給事中正德元年父進為兵部尚書故事  
大臣子不得居言職遂改翰林檢討及進忤劉瑾削籍  
竝謫誥全州判官父喪歸久之薦起尚寶丞復引疾歸  
家居授徒講學嘉靖初起南京通政參議改侍講學士  
直經筵遷太常卿掌國子監請於太學中建敬一亭勒  
御製敬一箴註程子四箴范浚心箴於石帝悅從之帝

將正文廟祀典誥請用木主文華殿東室舊有釋像帝  
命撤去誥所撰道統書言宜崇祀五帝三王以周公孔  
子配帝即採用其言十一年擢吏部右侍郎其冬拜南  
京戶部尚書弟讚亦長戶部兄弟竝司兩京邦計縉紳  
以為榮卒官贈太子太保謚莊敏誥官祭酒時諸生旅  
櫬不能歸者三十餘皆為葬之衣食不繼者竝周卹然  
頗善傳會時有白鵲之瑞誥獻論司業陳寰獻頌竝宣  
付史館給事中張裕謝存儒御史馮恩皆劾誥裕至此

之祝欽明帝怒下裕獄謫福建布政司照磨存儒亦調  
邊方恩詆譖學術迂邪詬求罷帝曰恩所詆乃指前日  
去土偶用水主事也爾以是介意邪其為帝眷寵如此  
讚字廷美進第三子也弘治九年進士授大名推官亦  
以辨疑獄知名召拜御史正德元年改編修劉瑾逐進  
讚亦出為臨淄知縣累遷浙江左布政使嘉靖六年入  
為光祿卿歷刑部左右侍郎知州金輅謫戍賂武定侯  
郭勛勛遣人篡取之指揮王臣不與縛臣以歸掠取其

賄事覺讚等請論如律帝憐勛諭法司毋刑輅等輅等  
遂不承尚書高友璣在告坐畏縮被劾去讚請如常訊  
具得勛納賄狀乃再奪其祿八年進尚書詔許六部歷  
事監生發廷臣奸弊有詹啓者許吏部侍郎徐縉下都  
御史汪鉉訊啓語塞已論罪啓復許縉及通政陳經等  
再下鉉訊鉉力斥其妄會太常卿彭澤欲傾縉代之偽  
為縉書抵張孚敬求解復碁孚敬劾縉賄已縉疏辨詔  
法司會錦衣衛訊讚等卒論啓誣罔而縉行賄事莫能

白坐除名帝方嘉啓能奉詔言事竟宥啓罪於是無賴  
子率持朝士陰事索貨財妄構事端入奏諸司為惕息  
軍人童源訐中官張永造瑩犯天壽山龍脉復嗾永弟  
容僕王謙等發容違法事奸人張雄又為謙草奏詆讚  
與兄誥及汪鉉廖道南史道內臣黃錦輩數十人受容  
重賂源亦上疏助之鞠得實源等並戍極邊告訐始少  
衰十年改讚戶部尚書馳驛歸省母母先卒服未闋詔  
以為吏部尚書服除始入朝帝以讚醇謹虛位待及至

論列不當意詔選官僚閣臣多引私黨言官劾罷十餘人帝以屬吏部讚乃舉霍韜毛伯溫顧璘呂柟鄒守益徐階任瀚薛蕙周鉄趙時春等詔璘柟蕙仍故官餘俱用之屢加少保兼太子太保九廟災自陳免居半歲帝難其代復起讚任之請發內帑借百官俸括富民財開鬻爵之令以濟邊需時議內地築墩堡讚謂非計帝以借俸括財非盛世事已之墩堡議亦寢翟鑒嚴嵩柄政多所請托郎中王與齡勸讚發之嵩辨之強帝眷嵩反



切責讚除與齡籍讚自是懾嵩不敢抗亦頗以賄聞矣  
鑾罷帝謀代者嵩以讚柔而易制引之詔以本官兼文  
淵閣大學士參預機務政事一決於嵩讚無所可否久  
之加少傅以年踰七十數乞休帝責其忘君愛身落職  
閒住歸三年卒後復官贈少師謚文簡論字廷議進少  
子也嘉靖五年進士授順德推官入為兵部主事改禮  
部好談兵幼從父歷邊境盡知阨塞險易因著九邊圖  
論上之帝喜頒邊臣議行自是以知兵聞累遷南京大

理寺丞會廷推順天巡撫論名列第二帝曰是上九邊  
圖論者即拜右僉都御史任之白通事以千餘騎犯黃  
崖口論督將士敗之再犯大木谷復為官軍所却錄功  
進右副都御史歲餘以病免諳達薄都城起故官撫山  
西錄防秋功進兵部右侍郎召理京營戎政以築京師  
外城轉左三十三年出督宣大山西軍務奸人呂鶴初  
與邱富以左道惑衆富叛降諳達為之謀主鶴遣其黨  
闌出塞外引寇入犯為偵卒所獲論遣兵捕鶴竝誅其

黨以功進右都御史再以功進兵部尚書廕子錦衣世  
千戶翁萬達為總督築大同邊牆六百里里建一墩臺  
於牆內後以兵少牆不能守盡撤而守臺論言兵既守  
臺則寇攻牆不得用其力及寇入牆率震駭逃散請改  
築於牆外每三百步建一臺俾矢石相及去牆不得越  
三十步高廣方四丈五尺其顛損三之一上置女牆營  
舍守以壯士十人下築月城穴門通出入度工費不過  
九萬金數月而足詔立從之寇萬騎犯山西論督軍遮

破之朔州川其犯宣府龍門者亦為將士所敗先後俘斬五百三十有奇加太子太保廕子如初三十五年兵部尚書楊博以父喪去召論代之當是時嚴嵩父子用事將帥率以賄進南北用兵帝責中樞甚急丁汝璈王邦瑞趙錦聶豹咸不得善去論時已老重自顧念一切將帥黜陟兵機進止悉聽世蕃指揮望由此損諳達子錫凌阿憤總督楊順納其逃妾擁衆圍大同右衛城數重城中拆屋而爨帝聞深以為憂密問嵩嵩意欲棄之

而難於發言請降諭問本兵論請復右衛軍馬歲辦五十萬金故為難詞冀以動帝帝顧亟措餉發兵易置文武將吏右衛園亦尋解給事中吳時來劾楊順因言論雷同附和曰昏酣置邊警度外帝遂削論籍嵩微為之解亦不能救也三十八年復起故官督薊遼保定軍務已圖爾犯薊西論厚集精銳以待至則為遊擊胡鎮所破分掠沙兒嶺燕子窩又却乃遁去事聞厚賚銀幣尋又奏密雲昌平二鎮防秋須餉銀三十餘萬給事中鄭

茂言論奏請過多請察其侵冒弊詔論回籍聽勘給事中鄧棟往覈具得虛冒狀奪官閒住未幾卒年七十二隆慶初復官謚恭襄曾孫浩然由世廕歷官太子太保左都督浩然子達廕錦衣指揮李自成陷京師不屈死其從兄佳蔭弘農衛指揮崇禎十四年賊破靈寶持刀赴鬪死焉

雍泰字世隆咸寧人成化五年進士除吳縣知縣太湖漲沒田千頃泰作堤為民利稱雍公堤民妾亡去妾父

訟其夫密殺女匿屍湖石下泰詰曰彼密殺汝女汝何以知匿所且此非兩月尸必汝殺他人女冀得賂耳一考而服召為御史巡鹽兩淮竈丁無妻者泰為婚匹出知鳳陽府父憂去服闋起知南陽余子俊督師薦為大同兵備副使擢山西按察使泰剛廉所至好搏擊豪強太原知府尹珍塗遇弗及避泰召至跪而數之珍不服泰竟笞珍珍訴於朝且告泰非罪杖人死逮下詔獄王恕請寬泰罪會事經赦乃降湖廣參議弘治四年轉浙

江右布政使復以母憂去十二年起右副都御史巡撫  
宣府官馬死軍士不能償泰言於朝以官帑市邊軍貧  
有妻者輒鬻泰請官為資給尚書周經因令貧者給聘  
財典賣者收贖軍盡歡參將王傑有罪泰劾之下泰逮  
問泰又請按千戶八人帝以泰屢抑武臣方詔都察院  
行勘而參將李稽坐事畏泰重劾乞受杖泰取大杖決  
之稽乃奏泰凌虐帝遣給事中徐仁偕錦衣千戶往按  
傑復使人走登聞鼓下訟泰妄逮將校至八十六人并



及其壻納賂事法司覈上褫為民武宗立給事中潘鐸等薦泰有敢死之節克亂之才吏部尚書馬文升遂起泰南京右副都御史提督操江固辭不赴正德三年春許進為吏部復起前官七月擢南京戶部尚書劉瑾泰鄉人也怒泰不與通甫四日即令致仕謂進私泰遂削二人籍而追斥馬文升及前薦泰者尚書劉大夏給事中趙士賢御史張津等為民其他罰米輸邊者又五十餘人泰歸居韋曲別墅不入城市瑾誅復官致仕年八

十卒卒時榻下有聲若震者泰奉身儉素貴賓至不過  
二肉為尚書無緋衣及卒家人始製以斂天啟中追謚  
端惠張津字廣漢博羅人成化末進士除建陽知縣築  
城郭遏礦盜建朱熹蔡元定諸賢祠置祭田畀其子孫  
憂歸補大治徵授御史弘治十四年冬吏部缺尚書廷  
臣推馬文升閔珪而津偕同官文森曾大有請用致仕  
尚書周經兩廣總督劉大夏忤旨下詔獄給事御史論  
救得釋已言陛下延訪大臣而庶官不預非所以明目

達聰也乞命卿佐侍從及考滿朝覲諸外僚咸得以時

進見通達下情武宗初巡按廣西劾總鎮中官韋經擅

移官帑預平富賀賊被賚出為泉州知府坐嘗舉秦勒

為民劉瑾敗起寧波知府遷山東左參政擢右僉都御

史提督操江進右副都御史巡撫應天諸府所部水旱

請停織造車駕北巡疏諫不報浙孝豐奸民據深山拒

捕積二十年莫能制津托別事赴浙悉縛之加戶部右

侍郎巡撫如故帝自宣府還復欲北幸津疏切諫不報

卒贈南京戶部尚書

陳壽字本仁其先新淦人祖志弘洪武間代兄戍遼東  
遂籍寧遠衛壽少負甚得遺金坐守至夜分還其主從  
鄉人賀欽學登成化八年進士授戶科給事中視宣大  
邊防劾去鎮守中官不檢者又嘗劾萬貴妃兄弟及中  
官梁芳僧繼曉繫詔獄得釋屢遷都給事中弘治元年  
王恕為吏部擢壽大理丞劉吉憾恕諷御史劾壽不習  
刑名冀以罪恕竟調壽南京光祿少卿就轉鴻臚卿十

三年冬以右僉都御史巡撫延綏和碩數盜邊前鎮巡官俱得罪去壽至蒐軍實廣間謀分布士馬為十道使互相應援軍勢始振明年諸部大入先以百餘騎來誘諸將請擊之壽不可自出帳擁數十騎據胡牀指麾飲食寇望見疑之引去諸道襲擊斬獲甚多朝廷方遣苗達等重兵至而壽已奏捷孝宗嘉之加祿一等達欲乘勝搗巢駐延綏久戰馬三萬匹日費芻菽不貲壽請出牧近塞就水草衆有難色壽跨馬先行衆皆從之省費

數十萬當戰捷時或勸注子弟名籍壽曰吾子弟不知  
弓槊寧當與血戰士同受賞哉竟不許十六年以右副  
都御史掌南院正德初劉瑾矯詔逮南京科道戴銑薄  
彥徽等壽抗章論救瑾恐令致仕尋坐延綏倉儲虧損  
罰米二千三百石布千五百匹負不能償上章自訴瑾  
慮知壽貧特免之中官廖堂鎮陝西貪暴楊一清以壽  
剛果九年正月起撫其地堂初奉詔製氊帳百六十間  
贏金數萬將遺權倖壽檄所司留備振復戒諭堂勿假

貢獻名有所科取堂怒將傾之壽四疏乞休不得堂爪  
牙數十輩散府縣漁利壽命捕之皆逃歸氣益沮其秋  
拜南京兵部侍郎陝人號呼擁輿移日不得行踰年乞  
骸骨就進刑部尚書致仕壽為給事中言時政無隱獨  
不喜劾人曰吾父戒吾勿作刑官易枉人言官枉人尤  
甚吾不敢妄言也嘉靖改元詔進一品階遣有司存問  
時年八十有三壽厯官四十年無家可歸寓南京所  
居不蔽風雨其卒也尚書李充嗣府尹寇天敘為之斂

又數年親舊賻助始得歸葬新淦

樊瑩字廷璧常山人天順末舉進士引疾歸養久之授  
行人使蜀不受餽土官作却金亭識之成化八年擢御  
史山東盜起奉命捕獲其魁清軍江北所條奏多著為  
例改按雲南交趾誘邊氓為寇馳檄寢其謀出知松江  
府運夫苦耗折瑩革民夫令糧長專運而寬其綱用以  
優之賦役循周忱舊法稍為變通民因大甦憂歸起知  
平陽弘治初詔大臣舉方面官侍郎黃孔昭以瑩應尚



書王恕亦器之擢河南按察使黃河為患民多流移瑩  
巡振全活甚衆河南田賦多積弊巡撫都御史徐恪欲  
考本末衆難之瑩曰視萬猶千視千猶百耳何難恪以  
屬瑩部吏鈎考旬日間宿蠹一清四年遷應天府尹守  
備中官蔣琮與言官訐奏所蔓引多至罪黜瑩承命推  
鞫初若不為異者琮大喜後奏其傷孝陵山脉事琮遂  
下獄充淨軍七年遷南京工部右侍郎尋改右副都御  
史巡撫湖廣錦田賊結兩廣猺獍為寇瑩諭散餘黨戮

首惡十八人歲餘以疾乞休家居七年中外交薦起故  
官撫治鄖陽旋改南京刑部右侍郎十六年雲南景東  
衛晝晦七日宜良地震如雷曲靖大火數發貴州亦多  
災異命瑩巡視至則劾鎮巡官罪黜文武不職者千七  
百人廉知景東之變乃指揮吳勇侵官帑圖脫罪因雲  
霧晦冥虛張其事劾罪之還進本部尚書武宗踐阼致  
仕歸劉瑾以會勘隆平侯爭襲事連及瑩削籍三年十  
一月卒年七十五明年又坐減松江官布罰米五百石

輸邊瑩素貧至是益窘瑾敗復官贈太子少保謚清簡  
瑩性誠慤農月坐籃輿戴笠子孫昇行田間曰非徒視  
稼欲子孫習勞也其後人率教多愿朴力學者

熊繡字汝明道州人其先以戍籍自豐城徙焉繡舉成  
化二年進士授行人奉使楚府巡茶四川力拒餽遺擢  
御史巡按陝西左布政于璠以官帑銀餽苑馬卿邵進  
繡發其罪璠遁赴京訐繡帝并下繡吏謫知清豐璠進  
亦除名久之鳳翔關知府擢繡任之弘治初遷山東左

參政進右布政使七年以右副都御史巡撫延綏榆林  
初僅小堡屯兵備冬景泰中始移巡撫總兵官居之遂  
為西北巨鎮城隘弗能容繡因請增築千二百餘丈涖  
鎮數年練兵積粟邊政修舉歷兵部左右侍郎尚書劉  
大夏深倚信之騰驤四衛勇士額三四萬人率虛籍歲  
糜錢穀數十萬多入奄人家庭臣屢請稽核輒被撓十  
八年命繡清釐未竟而孝宗崩朝政漸變繡力持不顧  
得詭冒者萬四千人御馬太監竈瑾等疏請復舊給事

御史交章劾瑾大夏亦力爭武宗不得已從之而宥瑾等不問正德元年擢右都御史總督兩廣軍務兼巡撫事既抵鎮盡裁幕府供億秋毫無所取二年與總兵官伏羌伯毛銳討平賀縣獍劉瑾以前汰勇士事深疾繡伺察無所得召掌南京都察院事尋以中旨罷之已復撫延綏倉儲汜爛為繡罪罰米五百石責繡躬輸於邊繡家遂破十年閏四月卒無子巡撫秦金頌其清節於朝贈刑部尚書太僕少卿何孟春以繡承繼孫幼且貧

無以為養請如主事張鳳翔孔琦例賜月廩且乞予謚  
遂謚莊簡給其孫米月一石

潘蕃字廷芳崇德人初冒鍾姓既顯始復成化二年舉  
進士授刑部主事歷郎中雲南鎮守中官錢能為巡撫  
王恕所劾詔蕃按盡得其實出為安慶知府改鄖陽時  
府治初設陝洛流民畢聚蕃悉心撫循皆成土著累遷  
山東湖廣左右布政使弘治九年以右副都御史巡撫  
四川兼提督松潘軍務宣布威信蠻人畏服軍車行松

茂莫敢犯遷南京兵部右侍郎就改刑部十四年進右都御史總督兩廣帳下士舊不下萬人蕃汰之纔給使令而已黎寇符南蛇亂海南聚衆數萬蕃令副使胡富調狼土兵討斬之平賊巢千二百餘所論功進左都御史已又平歸善劇賊古三仔唐大髻等思恩知府岑濬與田州知府岑猛相讐殺攻陷田州猛窮乞援蕃諭濬罷兵不從乃與鎮守太監韋經總兵官伏羌伯毛銳集兵十餘萬分六哨討之濬死傳首軍門斬級四千七百

盡平其地迴軍討平南海縣豐湖賊禡元祖捷聞璽書  
嘉勞蕃奏思恩宜設流官猛構兵失地宜降同知俾還  
守舊土兵部尚書劉大夏議猛世濟凶惡不宜歸舊治  
請兩府皆設流官而降猛為千戶徙之福建帝從之正  
德改元之正月召為南京刑部尚書踰年致仕初蕃去  
兩廣岑猛據田州不肯徙知府謝湖畏猛悍亦逗遛事  
聞逮湖詔獄湖委罪蕃及韋經毛銳經復委罪於尚書  
大夏劉瑾方惡大夏遂并逮四人大夏以不從蕃言為



罪而蕃亦坐不能撫猛領謫戍肅州三年九月也既而瑾從戶部郎中莊釋言遣太監韋霽覈廣東庫藏奏應解贓罰諸物多朽敝梧州貯鹽利軍賞銀六十餘萬兩不以時解逮問蕃及前總督大夏前左布政使仁和沈銳等八百九十九人罰米輸邊銳廉介已遷南京刑部右侍郎乞休歸至是奪職瑾誅蕃以原官致仕踰六年卒銳至嘉靖初始復職致仕方蕃解官歸無屋稅他人宅居之與鄉人飲露坐花下醉則任所之其風致如此

胡富字永年績溪人成化十四年進士授南京大理評事弘治初歷福建僉事福寧繫囚二百餘人富一訊皆定囹圄頓空以憂去起補山東遷廣東副使四會徭亂勦禽五百餘人瀧水徭出沒無時富度其所經地得荒田三千餘頃招獍戶耕牧其中徭畏獍不敢出擾居民得田作符南蛇圍儋州富與參議劉信往覘賊突至殺信富手斬劇賊一人賊乃退還益兵討平之歷陝西左右布政使正德初入為順天府尹三年進南京大理寺

卿就遷戶部右侍郎五年正月坐大理時勘事遲緩勒致仕亦瑾意也瑾敗起故官七年拜本部尚書南都倉儲僅支一年富在部三載有六年積上十餘事率權貴所不便格不行遂引年歸嘉靖元年卒贈太子少保謚康惠

張泰字叔亨廣東順德人成化二年進士除知沙縣時經鄧茂七之亂泰撫綏招集流亡盡復入為御史偕同官諫萬貴妃干政廷杖幾斃出督京畿學校以憂去家

居十餘年弘治五年起故官按雲南孟密土舍思揲構亂以兵遏木邦宣慰使罕它法於孟乃砦守臣撫諭拒聽泰與巡撫張誥集兵示必討思揲懼始罷兵滇池溢為民災泰築堤以弭其患還朝乞罷織造內臣減皇莊及貴戚莊田被災稅賦給畿省災民牛種詔止給牛種餘不行寇入永昌甘肅遊擊魯麟委罪副總兵陶楨而總兵官劉寧疏言守臣不和詔泰往勘泰奏鎮守太監傅真故總兵官周玉侵據屯田巡撫馮續減削軍餉

寇數入莫肯為禦失士卒六百餘馬駝牛羊二萬皆不以聞帝怒下之吏惠降內使錮南京續編氓口外泰又言甘州膏腴地悉為中官武臣所據仍責軍稅城北草湖資戍卒牧馬今亦被占請悉歸之軍且推行於延寧二鎮詔皆從之遷太僕少卿改大理初薊州民田多為牧馬草場所侵又侵御馬監及神機營草場皇莊貧民失業草場亦虧故額孝宗屢遣給事中周旋侍郎顧佐熊翀等往勘皆不能決至是命泰偕錦衣官會巡撫周

季麟復勘泰密求得永樂間舊籍參互稽考田當歸民者九百三十餘頃而京營及御馬監牧地咸不失故額奏入駁議者再尚書韓文力持之留中未下及武宗嗣位文再請始出泰奏流亡者咸得復業尋遷右副都御史督儲南京奏釐革十二事多報可正德二年召為工部右侍郎踰年遷南京右都御史泰清謹劉瑾專權朝貴爭賂遺泰奏表至京惟餽土葛瑾憾之其年十月令以南京戶部尚書致仕明年七月卒撫他事罰米數百

石瑾誅子塋祭如制吳文度字憲之晉江人從父客江寧遂家焉登成化八年進士除龍泉知縣徵授南京御史偕同官孫需等論妖僧繼曉被廷杖尋遷汀州知府徭弗靖設方畧綏撫徭承賦如居民弘治中厯江西左參政山西河南左右布政使正德元年遷右副都御史巡撫雲南師宗州賊阿本等作亂諭不從乃遣參議陳一經等督軍二萬攻之別遣兵截盤江據賊巢背先後俘斬千人入厯戶部侍郎三年冬進南京右都御史方

文度召自雲南劉瑾以地產金寶屢責賄文度無以應  
瑾深銜之會工部尚書李鏐致仕廷推文度及南京戶  
部侍郎王珩遂改文度南京戶部尚書與珩俱致仕命  
下舉朝駭異既歸所居屋僅數椽瑾誅未及用而卒珩  
趙人起家進士亦以清操聞

張鼎字用和歷城人成化十一年進士授襄陵知縣入  
為御史憲宗末年數笞言官鼎力諫又嘗劾妖僧繼曉  
方士鄧常恩等帝心惡之出按江西盜賊多強宗佃僕



鼎與巡撫閔珪交奏其事尹直等構之乃貶珪而坐鼎  
尹旻黨謫郴州判官弘治初擢河南僉事進參議以協  
治黃陵岡遷副使十五年進按察使鼎官河南久屢遭  
河患督治有方民為立祠是年秋擢右僉都御史巡撫  
遼東時軍政久弛又許餘丁納貲助驛遞給冠帶復其  
身邊人競援例避役鼎言不可因條上定馬割核屯糧  
清隱占稽客戶減軍伴數事悉允行尋劾分守中官劉  
恭貪虐罪築邊牆自山海關迄開原暨陽堡凡千餘里

遼撫自徐貫後歷張岫張玉陳瑤韓重四人多得罪去  
至鼎稱能武宗立移撫宣府正德改元召還尋進右副  
都御史署院事有知縣犯賊當褫職卒殺人當抵死劉  
瑾納重賄欲寬之鼎執不可出為南京右都御史焦芳  
子黃中欲強市其居畀通政魏納鼎不從芳父子亦怨  
之會瑾遣給事中王翊等覈遼東軍餉還奏芻粟多浥  
爛遂以為守臣罪逮鼎及繼任巡撫馬中錫鄧章前參  
政冒政參議方矩郎中王蓋劉繹下詔獄令其家人輸

米遼東鼎坐輸二千石以力不辦繫遼東久之總兵官  
毛倫等具奏諸人苦狀請得折價瑾勉從之閱三年事  
始竟皆斥為民瑾誅復官鼎前卒世宗初予卹冒政秦  
州人鼎同年進士歷官右副都御史巡撫寧夏守官廉  
劉瑾覬賄不得遂假遼東事逮之罰米至三千石瑾誅  
復職致仕久之卒

王璟字廷采沂人成化八年進士為登封知縣歷兩京  
御史弘治十四年以南京鴻臚卿拜右僉都御史理兩

浙鹽政振荒浙江奏行荒政十事多所全活十七年冬  
巡撫保定武宗立太監夏綬乞於真定諸府歲加葺場  
稅少監傅琢請履畝覈靜海永清隆平諸縣田太監張  
峻欲稅寧晉小河往來客貨詔皆許之又以莊田故遣  
緹騎逮民魯堂等二百餘人畿南騷動璟抗疏切諫尚  
書韓文等力持之管莊內臣稍得召還正德元年四月  
引疾致仕命馳傳歸三年坐累奪官閒住六年起撫山  
西製火槍萬餘槍藏箭六皆傳毒藥用以禦寇寇不敢

西累遷右都御史已遷左以張綸為右都御史代之後  
陳金以太子太保左都御史入院位璟上人號璟中都  
御史馬時羣小用事大臣靡然附之璟獨守故操再進  
太子太保世宗立致仕卒贈少保謚恭靖初璟自保定  
巡撫歸其後兵科給事中高滂勘滄州鹽山牧地劾六  
十一人及璟與前巡撫都御史高銓銓即滂父也詔去  
職者勿間璟銓竝獲免銓江都人累官南京戶部尚書  
正德二年廷推左都御史瑾勒令致仕尋生事逮下獄

復坐隆平侯家襲爵事除名罰米五百石後瑾益事操切每遣使勘核多務苛急承瑾意涉遂并銓在劾中涉後官至光祿少卿以劾父不齒於人瑾誅銓復官致仕卒贈太子少保

朱欽字懋恭邵武人師吳與弼以學行稱舉成化八年進士授寧波推官治最徵授御史出督漕運按河南清軍廣西竝著風節弘治中遷山東副使歷浙江按察使十五年八覲吏部舉天下治行卓異者六人欽與焉僉

都御史林俊又舉欽自代乃稍遷湖廣左布政使武宗立以右副都御史巡撫山東中官王岳被謫道死欽上言岳謫守祖陵罪狀未暴賜死道路不厭人心臣知岳為劉瑾輩所惡必瑾譖毀以至此望陛下察岳非辜懲瑾讒賊疏至瑾屏不奏銜之欽以山東俗淫酗嚴禁市酤令濟南推官張元魁察之犯者罪及鄰比有懼而自縊者其母欲奏訴元魁與知府趙璜賄之乃已瑾使偵事校尉發之俱逮下詔獄勒欽致仕璜除名元魁謫戍

瑾憾欽未已撫前湖廣時小故下巡按御史逮問俄坐  
山東勘地事斥為民又坐修曲阜先聖廟會計數多罰  
輸米六百石塞下又坐撫山東時以民夫給事尚書秦  
紘家再下巡按御史逮問瑾誅乃復官十五年卒年七  
十七與弼之門以宦學顯者欽為稱首

贊曰武宗初劉謝受遺輔政韓文張敷華等為列卿長  
當路多正人國事有賴八虎潛伏左右雖未敢顯與朝  
士為難固腹心之蠹也迨文等奮然抗疏搏擊翼除君



側之惡其事會方有可乘惜武宗庸闇轉令羣闇得以逞心反噬終至正人去國逆跋益張反覆之機實為間不容髮而諸臣力陳大計忠悃激發事雖不行其視李東陽之緘默取容者相去遠矣

明史卷一百八十六

欽定四庫全書

明史卷一百八十六考證

韓文傳中官督太和山乾沒公費文力遏之以其羨易  
粟萬石備振貸

臣

黃壽齡按中官原刻作中貴非

史體今改

韓文傳文條鹽政夙弊七事論殘鹽尤切孝宗嘉納

臣

黃壽齡按七事史未詳載考名臣實錄及識大錄

云一開中引鹽二興販私鹽三賤賣官鹽四買補殘

鹽五夾帶殘鹽六越境市鹽七轉運乏人謹附識

楊守隨傳近例軍官犯罪未結正者遇赦即原致此曹  
遷延以希倖免自今衆誣明白者即據律定案毋使  
逃罪雖遇赦亦不得免臣黃壽齡按亦不得免原  
刻作免亦不得文義不甚順今改

許進傳弘治元年擢右僉都御史巡撫大同臣黃壽

齡按今獻備遺進巡撫大同時上備邊四事曰定策  
應備戰具修整牆築屯堡史未之載謹附識

許進傳應詔陳時事八事

臣

黃壽齡按八事史未詳

載考今獻備遺作恤邊軍寬邊民專主守平輸納復  
軍糧便接遞去無益草冗官謹識

張泰傳尋遷右副都御史督儲南京奏釐草十二事多  
報可 臣黃壽齡按十二事考獻徵錄作專委任清

兌支均俸糧委監收廣儲積修常平清軍數總部運  
限積派重查糧稽住俸省守支謹識

卷末贊語

臣

黃壽齡按原贊以外攻內云云至末理

不正而論亦不當所引韓琦任守忠事比擬亦未合  
今改

欽定四庫全書薈要卷六千七百八十

史部

明史卷一百八十七

大學士張廷玉等奉 敕修

列傳第七十五

何鑑

馬中錫

陸完

洪鍾

陳蔣

鎬昇

陳金

俞諫

周南

孫祿

馬昊

何鑑字世光浙江新昌人成化五年進士授宜興知縣  
徵拜御史巡宣府大同劾巡撫鄭寧以下數十人不職  
按裨將孟璽等罪還巡太倉總督太監卒犯法逮治之  
為所搆下錦衣獄得釋再按江北鳳陽皇陵所在近境  
取寸木法皆死陵軍多倚禁虐民鑑請以山麓為限他  
樵採勿禁遂著為令出為河南知府振累歲饑條行荒  
政十事歷四川左右布政使弘治六年以右副都御史  
巡撫江南兼理杭嘉湖三府稅糧蘓松水災用便宜發

漕米十五萬石振之與侍郎徐貫疏吳淞白茆諸渠泄水入海水患以除復巡撫山東遷刑部侍郎以憂去十八年還朝時承平久生齒日繁孝宗覽天下戶籍數乃視國初反減咎所司溺職欲釐正之敕鑑以故官兼左僉都御史往河南湖廣陝西閱實戶口得戶二十三萬五千有奇口七十三萬九千有奇因疏善後十事及軍民利病以聞會孝宗已崩武宗悉採納之正德二十年南京兵部尚書叅議機務鑑前撫江南嘗按千戶張文



冤罪文冤亡去至是構於劉瑾而瑾亦噉鑑不與通遂  
坐以事連罰米貧不能償奏懇獲免六年正月召為刑  
部尚書時大盜並起劉寵劉宸楊虎劉惠齊彥名朱諒  
等亂畿輔方四曹甫監廷瑞鄢本恕等躡四川汪澄二  
羅光權王浩八王鈺五等擾江西皆稱王四方告急無  
虛日兵部尚書王敞不能辦賊帝既命陳金洪鍾馬中  
錫督師分討其年五月罷敞以鑑代之鑑乃選將練兵  
錄民間材武士令鄉聚悉樹柵浚溝團結相救河南山

西兵守黃河斷太行京操班軍留守所在城邑每漕艘  
運卒一人屯河濱護運道通行旅文武大吏軼賊請敕  
峻責之而褒縣令能擊賊者以中錫玩寇奏遣陸完代  
還調邊將從完討賊賊連為邊軍所破奔迸四出會中  
官谷大用伏羌伯毛銳率師駐臨清賊遂謀以十二月  
朔伺帝省牲南郊乘間犯駕先一日趨霸州鑑立奏聞  
夜設備厥明帝召問鑑鑑請早出安人心遂成禮而還  
賊知有備西掠保定諸州縣以去河南巡撫鄧璋請濟

師鑑言山東賊不及萬官軍奚啻十倍緣勢要私人營  
充頭目撓律攘功失將士心請盡譴若屬還都指揮以  
下失事即軍前行戮益調邊軍助璋帝悉從之尋以捷  
書屢聞加鑑太子少保明年正月賊哭霸州京師戒嚴  
鑑令邊兵亟邀賊賊遁去賊渠楊虎朱諒死其黨分擾  
山東河南鑑以山東賊劉寵劉宸齊彥名等責邊將許  
泰邵永劉暉李鉉以河南賊劉暉趙遂刑老虎等責邊  
將馮貞時源神周金輔未幾毛銳敗績與大用俱召還

鑑乃請用彭澤與仇鉞同辦河南賊而以山東賊專委陸完五月河南賊平七月山東餘賊亦平陳金洪鍾亦以次平江西四川諸賊帝喜加鑑太子太保廕子錦衣世百戶鑑乃上言羣盜蕩平民罹兵久乞量免田租多方振贍黜貪殘長吏停不急工役還民故業代以牛種復其家三年有訐舊事及怙惡者並置於理帝悉報可先是七月中間以羣盜未盡請留邊將劉暉戍山東時源成河南卻永成畿輔李鉉戍淮揚各假總兵之職俟

事寧始罷仇鉞言邊軍久勞風土不習人馬俱病今賊已漸平請留三之一討賊餘悉遣還廷議二人議俱是請四將各千人鎮壓他將許泰神周金輔溫恭輩俱統所部還邊鎮帝許之命延綏軍徑還遼東宣府大同軍過關勞賜帝時好弄兵羣小寵幸者言邊軍慙健過京軍遠甚宜留之京營帝以為然至十一月三鎮軍畢至遂命留之以京軍往代鑑力陳不可廷臣集議復極言其害帝竟不從自是邊軍於大內團操號為外四家軍

而江彬進用矣八年宣府送迤北降人托克托太等至京命充御馬監勇士鑑等言漢魏徙氏羌於關中郭欽江統皆勸晉武早絕亂階苻堅處鮮卑於漢南苻融亦慮其窺測虛實今使降人出入禁中假寵踰分且生慢侮萬一北寇聞之潜使黠賊偽降以為間謀寧不為將來患哉帝不聽寧王宸濠謀復護衛鑑力遏之都督白玉以失事罷厚賄豹房諸倖臣求復鑑執不從諸倖臣嗾訶事者發鑑家僮取將校金錢言官遂交章劾鑑致

仕去閔九年卒年八十

馬中錫字天祿故城人父偉為唐府長史以直諫忤王  
械送京師而盡縲其家人中錫以幼免乃奔訴巡按御  
史御史言於王釋其家奉生母走京師訴冤父竟得白  
終處州知府中錫舉成化十年鄉試第一明年成進士  
授刑科給事中萬貴妃弟通驕橫再疏斥之再被杖公  
主侵畿內田勘還之民又嘗劾汪直違忤罪歷陝西督  
學副使弘治五年召為大理右少卿南京守備太監蔣

琮與兵部郎中婁性指揮石文通相訐連數百人遣官  
按不服中錫偕司禮太監趙忠等往一訊得實性除名  
琮下獄抵罪擢右副都御史巡撫宣府劾罷貪耄總兵  
官馬儀革鎮守以下私役軍士使隸尺籍寇嘗犯邊督  
軍敗之引疾歸中外交薦武宗即位起撫遼東還屯田  
於軍而劾鎮守太監朱秀置官店擅馬市諸罪正德元  
年入歷兵部左右侍郎劉瑾初得志其黨朱瀛冒邊功  
至數百人尚書閻仲宇許之忠錫持不可瑾大恚中旨



改南京工部明年勒致仕其冬逮繫詔獄械送遼東責償所收腐粟踰年事竣斥為民瑾誅起撫大同中錫居官廉所至革弊任怨以故有名六年三月賊劉六等起吏部尚書楊一清建議遣大臣節制諸道兵乃薦中錫為右都御史提督軍務與惠安伯張偉統禁兵南征劉六名寵其弟七名宸文安人也並驍悍善騎射先是有司患盜召寵宸及其黨楊虎齊彥名等協捕頻有功會劉瑾家人梁洪徵賄於寵等不得誣為盜遣甯果柳尚

義繪形捕之破其家寵等乃投大盜張茂茂家高樓重  
屋複壁深窖素招亡民為逋逃主宦官張忠與鄰茂結  
為兄彘緣馬永成谷犬用于經輩得出入豹房侍帝蹙  
鞠而乘間為盜如故後數為河間參將袁彪所敗茂窘  
求救於忠忠置酒私第招茂彪東西坐酒酣舉觴屬彪  
字茂曰彥實吾弟也自今毋相厄又舉觴屬茂曰袁公  
善爾爾慎毋犯河間彪畏忠唯唯而已後茂為甯果所  
禽寵等相率詣京謀自首忠與永成為請於帝且曰必

獻萬金乃赦寵辰不能辨逃去既而瑾誅有詔許自首  
寵等乃出詣官兵部奏赦之令捕他盜自効寵等憚要  
束未幾復叛黨日衆所至陷城殺將吏中錫等受命出  
師敗賊於彰德既又敗之河間進左都御史然賊方熾  
諸將率畏懦莫敢當其鋒或反與之結參將桑玉嘗遇  
賊文安村中寵宸窘蹙跳民家樓上欲自剄而玉素受  
賂故緩之有頃彥名持大刀至殺傷數十人大呼抵  
樓下寵宸知救至出射殺數人玉大敗參將宋振禦賊

棗強不發一矢城遂陷死者七千人當是時寵宸等自畿輔犯山東河南南下湖廣抵江西復自南而北直窺霸州楊虎等由河北入山西復東抵文安與寵等合破邑百數縱橫數千里所過若無人中錫雖有時望不習兵偉亦紉袴子見賊強諸將怯度不能破賊乃議招撫謂盜本良民由酷吏甯杲與中官貪黷所激若推誠待之可毋戰降也遂下令賊所在勿捕過勿邀擊饑渴則食飲之降者待以不死賊聞欲就撫相戒毋焚掠猶豫

未定而朝廷以京軍弱議發邊兵中錫欲戰則兵未集  
欲撫則賊時向背終不得要領既建議主撫不能變會  
寵等聞邊兵且至退屯德州桑園中錫肩輿入其營與  
酒食開誠慰諭之衆拜且泣送馬為壽寵慷慨請降宸  
乃仰天咨嗟曰騎虎不得下今奄臣柄國人所知也馬  
都堂能自主乎遂罷會而是時方詔懸賞格購獲賊寵等  
偵知之益疑懼徑去焚掠如故獨至故城戒毋犯馬都  
堂家由是中錫謗大起謂其以家故縱賊言官交劾之

下詔切責中錫猶堅持其說以請兵部尚書何鑑謂賊誠解甲則貫死即不然毋為所誑既而寵等終不降乃遣侍郎陸完督師而召中錫偉還初中錫受命討賊大學士楊廷和謂楊一清曰彼文士耳不足任也竟無功與偉同下獄論死中錫死獄中偉革爵十一年巡按御史盧雍追訟中錫寃謂賊實聽撫僉事許承芳忌之潛請益兵疑賊心及賊再受約方至軍門而檻車已就道矣朝廷乃復中錫官賜祭予廕

陸完字全卿長洲人為諸生中官王敬至蘓以事廷曳  
諸生諸生競起擊之完不與惡完者中之敬遂首列完  
名上聞巡撫王恕極論敬罪完及得免舉成化二十三  
年進士謁選恕方為吏部曰是嘗擊奄人者當為御史  
入臺果有聲正德初厯江西按察使寧王宸濠雅重之  
時召預曲宴以金罍為贈三年冬擢右僉都御史巡撫  
宣府劉瑾惡完赴闕後期命以試職視事明年夏復改  
南院督江防軍完以都御史試職非故事懼甚賄瑾召

為左僉都御史五年春拜兵部侍郎瑾敗言者劾其黨  
附帝不問明年霸州賊劉六劉七等起奉楊虎為首惠  
安伯張偉右都御史提督軍務出無功逮繫論死八月  
詔完兼右僉都御史提督軍務統京營宣府延綏軍討  
之行及涿州忽傳賊且逼京師命還軍入衛會副總兵  
許泰游擊邵永等敗楊虎等於霸州賊南走京師始解  
嚴指揮賀勇等再敗賊信安副總兵馮楨復大敗之阜  
城分兵追擊賊東圍滄州會劉六七中流矢乃解而南



陷山東縣二十楊虎兵亦北殘威縣新河於是完頻請  
濟師益發遼東山西諸鎮兵逐賊賊益南圍濟寧焚運  
舟轉寇曹州楨泰永擊斬二千餘人獲其魁朱諒錄功  
進完右都御史諸將皆增秩中官谷大用張忠意賊旦  
暮平乃自請督師詔以大用總督軍務伏羌伯毛銳充  
總兵官忠監神鎗統京軍五千人會完討賊時劉六等  
縱橫沂莒間而楊虎陷宿遷執淮安知府劉祥靈璧知  
縣陳伯安連陷虹永城虞城夏邑及歸德州邊兵追及

賊退至小黃河渡口百戶夏時設伏蹙之虎溺死餘賊奔河南推劉惠為首大敗副總兵白玉軍攻陷沈邱殺都指揮王保執都指揮潘翀北陷鹿邑有陳翰者與甯龍謀奉惠為征討奉天大元帥趙燧副之翰自為侍謀軍國重務元帥府長史與龍立東西二廠治事分其軍為二十八營以應列宿營各置都督聚衆至十三萬欲牽制官軍於是惠鏖擾河南劉六及齊彥名等擾山東黨分為二已而六復轉而北永敗之濰縣還趨霸州帝

將出郊省牲聞之懼急召完赴援完擊破之文安賊南至湯陰完又督諸將追敗之先後俘斬千人當是時六等衆號數萬然多脅從精銳不過千餘人自兵部下首功令官軍追賊賊輒驅良民前行急則棄所掠逸去官軍所殺皆良民以故捷書屢奏而賊勢不衰明年正月六等復突霸州京師戒嚴詔完及大用銳還禦近畿賊乃西掠博野攻蠡縣臨城大用銳與遇於長垣大敗廷議召二人還別命都御史彭澤同咸寧伯仇鉞辦河南

賊以畿輔山東賊委完完遣永追敗劉六於宋家莊賊南犯滕縣副總兵劉暉大敗之賊遂奔登萊海套完師次平度檄永玉與游擊溫恭三道進攻命副總兵張俊李鎡及泰暉分軍邀其奔逸賊走連戰皆大敗之賊乃變服易馬而遁先後禽斬二千六百餘人賊止三百人北走沿途招聚勢復張剽香河寶坻玉田轉攻武清游擊王杲敗沒巡撫甯杲兵亦敗畿輔復震動而賊轉南至冠縣暉襲敗之指揮張勛又敗之平原賊南奔邳州

渡河抵固始會河南賊已平劉六等勢益衰遂走湖廣  
奪舟至夏口遇都御史馬炳然殺之復登陸焚漢口為  
指揮滿弼等追及劉六中流矢與子仲淮赴水死劉七  
齊彥名率五百人舟行自黃州順流抵鎮江南京告急  
完疾趨而南帝命彭澤仇鉞會完軍進勦大兵盡集江  
南北賊猶乘潮上下肆掠操江武靖伯趙弘澤都御史  
陳世良遇之敗績死者無算七月賊治舟孟瀆完等至  
鎮江留鉞防守命恭以騎駐江北暉永以舟趨江陰完

率都指揮孫文傳鎧趨福山港賊懼抵通州颶風大作  
棄舟走保狼山完命同知羅瑋夜導軍登山南蹙之彥  
名中槍死七中矢亦赴水死餘賊盡平還朝進完太子  
少保左都御史廕子錦衣世百戶明年代何鑑為兵部  
尚書完有才智急功名善交權勢劉暉許泰江彬皆其  
部將後並寵倖用事完遂得其力時宸濠已萌異志聞  
完為兵部致書盛陳舊好欲復護衛及屯田完答書令  
以祖制為詞宸濠遂遣人輦金帛鉅萬寓所善教坊臧

賢家徧遺用事貴人屬錢寧為內主比奏下完遂為復  
請而以屯田屬戶部請付廷議內閣擬旨上並予之舉  
朝譁然六科給事中高滂十三道御史汪賜等力爭章  
並下部久不覆南京給事中徐文溥繼言之完乃請納  
諫官言帝竟不許十年改吏部尚書宸濠反就執中官  
張永至南昌搜其籍得完平日交通事上之帝大怒還  
至通州執完收其母妻子女封識其家比還京反縛之  
竿揭姓名於首雜俘囚中列凱旋前部以入將寘極刑

值武宗崩世宗立法司覆奏完交外藩而遺金不却處  
護衛而執奏不堅當斬完復乞哀下廷臣覆讞以平賊  
功在八議之列遂得減死戍福建靖海衛母年九十餘  
竟死獄中初完嘗夢至一山曰大武及抵戍所有山如  
其名嘆曰吾戍已久定何所逃乎竟卒於戍所

洪鍾字宣之錢塘人成化十一年進士為刑部主事遷  
郎中奉命安輯江西福建流民還言福建武平上杭清  
流永定江西安遠龍南廣東程鄉皆流移錯雜習鬪爭



易亂宜及平時令有司立鄉社學教之詩書禮讓弘治  
初再遷四川按察使馬湖土知府安鼇恣淫虐土人怨  
之刺骨有司利其金置不問遷延二十年僉事曲銳情  
巡按御史張鸞按治鍾贊決捕鼇送京師寘極刑安氏  
自唐以來世有馬湖至是改流官一方始靖厯江西福  
建左右布政使十一年擢右副都御史巡撫順天整飭  
薊州邊備建議增築塞垣自山海關西北至密雲古北  
口黃花鎮直抵居庸延亘千餘里繕復城堡二百七十

所悉城緣邊諸縣因奏減防秋兵六千人歲省輓輸犒  
賚費數萬計所部潮河川去京師二百里居兩山間廣  
百餘丈水漲成巨浸水退則坦然平陸寇得長驅直入  
鍾言闢以東三里許其山外高內庳約餘二丈可鑿為  
兩渠分殺水勢而於口外斜築石堰以束水置關堰內  
守以百人使寇不得馳突可免京師北顧憂且得屯種  
河孺地兵部尚書馬文升等請從之比興工鑿山山石  
崩壓死者數百人御史戈福給事中馬子聰等劾鍾巡

撫張烜等請罷役不聽未幾工成侍郎張達偕司禮中  
官往視還言石洞僅洩小水地近邊垣多沙石不利耕  
種給事中屈伸等劾鍾欺妄三罪諸言官及兵部皆請  
逮鍾帝以鍾為國繕邊不當罪停俸三月正德元年由  
巡撫貴州召督漕運兼巡撫江北明年就進右都御史  
蘓松浙江運舟由下港口及孟瀆河沂大江以達瓜洲  
遠涉二百八十餘里往往遭風濤鍾言孟瀆對江有夾  
河可抵白塔河口舊置四閘徑四十里至冥陵鎮再折

而北即抵揚州運河開濬為便從之改掌南京都察院  
就遷刑部尚書四年冬加太子少保兼左都御史掌院  
事五年春湖廣歲饑盜起命鍾以本官總制軍務陝西  
河南四川亦隸焉沔陽賊楊清邱仁等僭稱天王將軍  
出沒洞庭間圍岳州陷臨湘官軍屢失利鍾及總兵官  
毛倫檄都指揮潘勲柴奎布政使陳鎬副使蔣昇擊破  
之於麻穰灘禽斬七百四十餘人賊遂平初鍾掌院事  
劉瑾方熾及瑾誅言官劾鍾徇瑾撻御史朝議以鍾討

賊置不問時保寧賊藍廷瑞自稱順天王鄢本恕自稱  
刮地王其黨廖惠稱埽地王衆十萬餘置四十八總管  
延蔓陝西湖廣之境廷瑞與惠謀據保寧本恕謀據漢  
中取鄖陽由荆襄東下巡撫林俊方議遏通江而惠已  
至攻陷其城殺參議黃瓚僉事錢朝鳳等遁去適官軍  
自他郡還賊疑援兵至亦遁俊益發糶糴及石柱土兵  
助朝鳳進勦參議公勉仁亦會龍灘河漲賊半渡糶糴  
奮擊之禽斬八百餘人墜崖溺水甚衆俊復遣知府張

敏何珊等追之獲惠餘衆奔陝西西鄉鍾乃下令招之  
歸者萬餘人既而賊收散亡陷營山殺僉事王源縱掠  
蓬劍二州鍾赴四川與俊議多不合軍機牽制賊益熾  
己乃檄陝西湖廣河南兵分道進湖廣兵先追及於陝  
西石泉廷瑞走漢中都指揮金冕圍之陝西巡撫藍章  
方駐漢中廷瑞遣其黨何虎詣章乞還川就撫章以廷  
瑞本川賊恐急之必致死陝且受患遂令冕護之出境  
廷瑞既入川求降鍾等令至東鄉聽撫賊意在緩師遷

延累月依山結營要求營山縣或臨江市屯其衆遣官  
為質鍾令漢中通判羅賢入其營本恕來謁約既定會  
官軍有殺其樵採者賊復疑懼遂殺賢剽如故官軍為  
七壘守之賊不得逸其黨漸潰廷瑞以所掠女子詐為  
己女結婚於永順土舍彭世麟冀得間逸去世麟密白  
鍾鍾授方畧使圖之及期廷瑞本恕暨其黨王金珠等  
二十八人咸來會伏發悉就禽惟廖麻子得脫其衆聞  
變驚潰渡河鍾遣兵追擊俘斬七百餘人以功進太子

太保未幾廖麻子及其黨曹甫掠營山蓬州七年總兵  
官楊宏副使張敏馬昊何珊等合擊之賊勢蹙鍾乃議  
招撫敏以單騎詣甫營甫聽命遂赴軍門受約束歸散  
其黨而麻子忿甫背已殺之并其衆轉掠川東官軍不  
敢擊潛躡賊後馘良民為功土兵虐尤甚時有謠曰賊  
如梳軍如篦土兵如鬚巡按御史王綸紀功御史汪景  
芳劾鍾縱兵不戢綸後奏鍾樂飲縱遊致賊自合州渡  
江陷州縣詔召鍾還以彭澤代鍾遂乞歸嘉靖三年卒



謚襄惠陳鎬會稽人成化二十三年進士既平賊就遷右副都御史巡撫湖廣蔣昇祁陽人鎬同年進士

陳金字汝礪應城人徙武昌祖坦夔州知府父琳廣西僉事金舉成化八年進士除婺源知縣擢南京御史弘治初出按浙江還因災異劾文武大僚十九人侍郎丁永中南京大理卿吳道宏南寧伯毛文等多罷去尋遷山西副使歷雲南左布政使討平竹子箐叛苗十三年就拜右副都御史巡撫其地孟養酋思祿與孟密酋思

操構兵積年金奉詔發緬甸千崖隴川南甸諸部兵聚糧十二萬為征討計而遣參議郭緒往撫之思祿懼遂罷兵修貢金以功賚銀幣貴州兵敗賊婦米魯不魯退攻平夷衛及大河扼勒諸堡金發兵連破之增俸一等名為南京戶部右侍郎正德改元給事中周璽等劾不職大臣金與馬詔不問金以母老乞歸不允尋以右都御史總督兩廣軍務時內臣韋靄等建議請輸兩廣各司所貯銀於京師金疏不可詔留二十餘萬馬平洛容

撞獨獼金偕總兵官毛銳發兵十三萬征之俘斬七十  
餘人進左都御史斷藤峽苗時出剽金念苗嗜魚鹽可  
以利縻也乃立約束令民與苗市改峽曰永通苗性貪  
而黠初陽受約既乃不予直殺掠益甚潯州人為語曰  
永通不通來葬江中誰其作者噫陳公蓋咎金失計也  
三年十月遷南京戶部尚書明年冬召為左都御史未  
聞命以母喪歸六年二月江西盜起詔起金故官總制  
軍務南畿浙江福建廣東湖廣文武將吏俱隸焉許便

宜從事都指揮以下不用命者專刑戮當是時撫州則東鄉賊王鈺五徐仰三傳保一揭端三等南昌則姚源賊汪澄二王浩八殷勇十洪瑞七等瑞州則華林賊羅光權陳福一等而贛州大帽山賊何積欽等又起官軍累年不能克金以屬郡兵不足用奏調廣西狼土兵明年二月先進兵東鄉遣叅議徐蕃等分屯要害而令副總兵張勇士官岑塋岑猛各統官兵目兵擊賊熟塘進戰南壕追敗之赤岫蔭嶺禽仰三馘鈺五等克柵二百

六十五斬首萬一千六百餘級俘七百五十餘人五月  
移師姚源合岑政董朴吳廷舉等分營餘千安仁貴溪  
鄱陽樂平遏賊而親統大軍搗其巢勇十重創死會張  
勇以目兵至毒弩射殺瑞七成七等俘斬共五千餘人  
七月乘勝斬光權華林賊盡平又督副使王秩等擊大  
帽山賊獲積欽俘斬千七百餘人半歲間勦賊幾盡遂  
即東鄉三縣竝立萬年縣招降人居之前後每奏捷輒  
賜璽書嘉勞賚銀幣加大子少保廕子錦衣世百戶金

累破劇賊然所用目兵貪殘嗜殺剽掠甚於賊有巨族數百口闔門罹害者所獲婦女率指為賊屬載數千艘去民間謠曰土賊猶可土兵殺我金亦知民患之方倚其力不為禁又不能持廉軍資頗私入功雖多士民皆深怨焉東鄉之役塗兵縱弩射趨捷若飛賊大窘塗兵要賞千金金靳不予乃縱賊使逸桀黠者多不死尚數千人金急欲成功遂下令招撫其破姚源賊也金喜謂功在旦夕與將吏置酒高會賊覘諸要害無守者乃悉

所有賂目兵乘暮遁去時賊絕饗已三日自分必死沿途棄雜弱散婦女及抵貴溪始得一飽食遂轉掠衢徽間金知失策亦下令招降賊首王浩八等故偽降以緩官兵攻剽如故卒不能盡賊紀功給事中黎奭及兩京言官交章劾金乃召金還以俞諫代金遂請終喪去十年再起督兩廣軍務府江賊王公珣等為亂金集諸道兵偕總兵官郭勛等分六路討之斬公珣大有所俘獲加少保太子太保廕子如初復以饒平捷詔子先受廕

者進一秩金承召還朝道得疾歸詔強起之十四年冬入掌都察院事世宗立請老命乘傳還久之卒

俞諫字良佐桐廬人父蓋舉進士官御史按江西治外戚王氏萬氏宗族恣橫罪坐事謫澧州判官大築陂堰溉田可萬頃累遷鄖陽知府諫舉弘治三年進士授長清知縣擢南京御史遷河南僉事禽嵩賊呂梅歷江西叅議平大帽山賊遷廣東副使中道召為大理少卿正德六年擢右僉都御史治水蘇杭諸府修治圩塘民享



其利尋進右副都御史提督操江八年春姚源降賊王  
浩八叛詔以諫代陳金督江西浙江福建諸軍討之時  
浩八衆萬餘屯浙江開化為同知伍文定等所敗遁還  
江西德興以所執都指揮白弘江洪為質求撫於按察  
使王秩秩受之為傳送姚源浩八奔據貴溪裴源山餘  
衆復集連營十里諫令秩與副使胡世寧叅政吳廷舉  
列屯要害斷其歸路而躬與都督李鎡乘夜冒雨潛進  
大破之俘斬數千人遂禽浩八其黨潰走玉山諫與南

贛巡撫周南江西巡撫任漢復擊斬七百餘人餘賊奔

姚源諫督廷舉等進勦逼禽之諫懲金失一意用兵而  
任漢儒先為布政使嘗贊金主撫雖亟上首功追賊緩  
餘黨復起先是東鄉賊為金所敗乞降隸世寧號新兵  
而剽掠如故既懼罪復叛遣叅將桂勇等討禽之萬年  
雖立縣賊尚衆吏胥多賊黨官府動息必知之副使李  
情治峻急衆欲叛畏鉞在餘干不敢發會鉞卒王垂七  
胡念二等遂作亂殺情及饒州通判陳達秦碧指揮邢

世臣等焚解舍諫發兵禽之亂乃定言官劾諫及漢南  
兵部請召漢還命諫兼領巡撫明年擊臨川賊斬其魁  
而遣叅將李隆擊新塗賊賊踞萬山中僭稱王且八年  
隆等深入悉就禽俘斬千七百餘人錄功進諫右都御  
史巡撫如故劇賊徐九齡者初嘯聚建昌醴源已出沒  
江湖間積三十年黃州德安九江安慶池州太平咸被  
其害諫討斬之羣盜悉平寧王宸濠諷御史張鰲山劾  
諫十一年召還遂乞致仕嘉靖改元用薦起故官總督

漕運青州礦盜王堂等起顏神鎮流劫東昌兗州濟南  
都指揮楊紀及指揮楊浩等擊之浩死紀僅免詔責山  
東將吏於是諸臣分道逐賊賊不復屯聚流劫金鄉魚  
臺間突曹州欲渡河不得復掠考城竝河西岍至東明  
長垣河南及保定守臣咸告急賊黨王友賢等轉掠祥  
符封邱南抵徐州廷議以諸道巡撫權位相埒乃命諫  
與都督魯綱竝提督兩畿山東河南軍務以便宜節制  
諸道兵討之賊復流至考城官軍方欲擊而河南降賊

張進引三百騎馳至中都留守顏愷與俱前方戰進忽  
三麾其旗先却賊乘之官軍大潰將士死者八百餘人  
諫等連營進賊始滅其秋召掌都察院事踰年卒官贈  
太子太保謚莊襄

周南字文化縉雲人成化十四年進士除六合知縣擢  
御史出按畿輔弘治初再按廣東劾總兵官柳景厯江  
西右布政使擢右副都御史巡撫大同武宗初立寇入  
宣府叅將陳雄等邀擊敗之錄功增南俸一秩母喪歸

正德三年劉瑾擅政以大同倉米有浥爛者逮南及督糧郎中孫祿下詔獄械送大同責倍輸會赦大同總兵官葉椿等為請免其倍數輸畢釋為民瑾誅以故官撫宣府不就引病歸明年起督南贛軍務南贛巡撫之設自南始汀州大帽山賊張時旺黃鏞劉隆李四仔等聚衆稱王攻剽城邑延及江西廣東之境數年不靖官軍討之輒敗推官莫仲昭知縣蔣瓊指揮楊澤等被執賊勢愈熾南集諸道兵擊之龍牙禽時時義民林富別擊

斬鏞於鐵坑其他諸砦為指揮孫堂等所破而副使楊  
璋僉事凌相等亦擊隆四仔禽之先後斬獲五千人仲  
昭等得逸還捷聞賜敕獎勞南乃移師會總督陳金共  
平姚源諸賊境內遂寧九年春進右都御史總督兩廣  
軍務踰年乞歸卒贈太子少保孫祿棲霞人弘治九年  
進士由戶部主事歷郎中瑾敗起故官累遷至應天府  
尹

馬昊本姓鄒字宗大寧夏人弘治十二年進士由行人

選御史正德初遷山東僉事坐累謫真定推官境內數有盜昊教吏士習射廣設方略盜發輒獲至坐累謫判開州真定吏民伏闕請留乃免遷四川僉事昊長身驍捷善騎射知兵巨寇方四書甫等方熾洪鐘討之久無功昊至閱所部笑曰將不知兵其何以戰於是擇健卒千人分數隊隊立長教之會甫將襲江津昊從巡撫林俊勦賊大敗之俘斬及焚死者二千餘人明年方四陷江津破綦江薄重慶昊夜出百騎舉人擊賊賊驚潰乘



之斬獲多遂合獠獠土兵搏賊賊陳左而伏兵其右吳以正兵當左身率百騎搗其伏伏潰趨左左亦潰四奔婺川與甫相攻衆遂散四變姓名走為他將所獲吳再被獎進副使與總兵官楊宏擊敗甫甫降而其黨廖麻子併其衆連陷銅梁榮昌坐奪冠帶時洪鍾已召還巡撫高崇熙惟怯復主撫麻子等陽受約崇熙遽罷諸軍令副使張敏徙開縣臨江市民空其地處之許給復三年為請於朝昊力爭謂臨江市屬襟喉上達重叙下連

湖湘地土饒衍奈何棄以資賊自遺患崇熙不從吳乃  
益治兵觀變其明年賊果執敏叛詔逮崇熙而擢吳右  
僉都御史代之賊圍中江將趨成都吳以五千騎與總  
督彭澤敗之遊擊閻動追斬麻子劍州餘衆走推其黨  
喻思倖為主總兵官陳珣追至富村賊偽降因北度江  
襲殺都指揮姚震轉入巴山故巢尋出走大安鎮珣不  
敢前而陝西兵與賊戰潰賊遂越寧羌犯畧陽珣軍鼓  
譟賊夜走度廣元為官軍所遏還趨通巴招餘黨諸將

率稱病不擊賊詔逮珣且讓昊昊乃與彭澤督諸軍獲  
思倖西鄉山中復與澤平內江賊駱松祥羣盜悉靖錄  
功進副都御史十年伊伯格勒寇松潘番人磨讓六少  
等乘機亂為之鄉導西土大震昊招土番為間發兵掩擊  
千戶張倫等夜率熟番攻破賊獲磨讓六少伊伯格勒  
遜去昊以松潘險阻番人往往邀劫饋運乃躬督叅將  
張傑等修築牆柵自三舍堡至風洞關凡五十里賜敕  
褒之烏蒙芒部二府壤接筠連珙縣圍亘千里山箐深

阻諸蠻獉人子羿子仲家子猫子猱等雜居其中有  
獉人子普法惡者通漢語曉符錄妄言彌勒出世自稱  
蠻王煽諸夷作亂流民謝文禮謝文義應之都指揮杜  
琮戰敗文義奪其胄十二年昊督指揮曹昱進討法惡  
敗走保青山砦昊分據水口絕其汲道闕南山圍待之  
賊乏水渴突南圍官軍遮擊法惡中流矢死諸蠻大奔  
以功再進右都御史廕子錦衣世百戶昊有才氣能應  
變揮霍自喜所向輒有功然官川中久狎其俗銳意立

功名卒以是敗先是伊伯格勒遁吳移兵攻小東路番  
砦未下茂州羣蠻懼見侵遂糾生苗圍城堡叅將芮錫  
等討之兵敗指揮龐昇等皆死又嘗遣副總兵張傑副  
使吳澧擊松潘南北二路番不利亡軍士三千餘人匿  
不以聞楚蠻平不置戍守遽班師請改高縣為州設長  
吏增高洪筠連田租千八百石令指揮魏武度田奪降  
人業給之軍民而珙縣知縣步梁窺吳意誘殺降人阿  
尚杜琮以亡胄故怨文義潛使人購其頭於是文義乘

羣蠻怨嗾之遂大誼攻高慶符二縣破其城琮率兵禦之又敗死傷七百人自黎雅以西天全六番皆相繼亂南京給事中孫懋暨巡按御史盧雍黎龍先後劾昊十四年遂遣官逮昊行至河南疏稱疾篤留於家世宗即位始就逮尋削籍歸楊一清胡世寧薦之為桂萼所駁而止久之卒

贊曰何鑑綰中樞能任諸將滅賊蓋其時楊廷和在政府閣部同心故克奏效云爾馬中錫雅負時望而軍旅

非其所長適用取敗然觀劉宸阻降之言亦可以觀朝  
事矣陸完交結之罪浮於首功得從八議有佚罰焉洪  
鍾陳金威略甚著而土兵之謠聞之心惻斯又統戎旃  
者所當留意也

明史卷一百八十七

欽定四庫全書

明史卷一百八十七考證

洪鍾傳詔召鍾還以彭澤代鍾遂乞歸嘉靖三年卒諡

襄惠


臣

黃壽齡按識大錄鍾乞歸章凡七上始允

之嘉靖初特進光祿大夫柱國賜元纁羊酒遣有司  
勞問卒年八十有一謹附識







總校官編修臣吳紹深